



## Communicaziun a las medias da la Dretgira superiura

Sentenzia dals 24 da zercladur 2025 (ZR2 25 11)

***La Radio Alpin Grischa SA sco era ses organs Roger Schawinski e Stefan Bühler dastgan per il mument utilisar «Radio Grischa» per la designaziun d'in emettur da radio. La Dretgira superiura refusescha ina dumonda da la Samedia SA, la Radio Grischa SA e la Südostschweiz Radio SA per il relasch d'in scumond preventiv.***

La Radio Alpin Grischa SA da l'interpretar da medias Roger Schawinski e ses partenari da fatschenta Stefan Bühler ha lantschà ils 2 d'avrigl quest onn in radio-web sut il num «Radio Grischa» sin la domain «radiogrischa.com». Ils 3 d'avrigl 2025 han la Samedia SA, la Radio Grischa SA e la Südostschweiz Radio SA inoltrà ina dumonda per il relasch d' in scumond preventiv tar la Dretgira superiura. En la dumonda han ellas renfatschà a la Radio Alpin Grischa SA e ses organs, da violar la Lescha federala cunter la concorrenza illoiala (Bundesgesetz gegen den unlauteren Wettbewerb [UWG]) cun lur radio-web.

En sia sentenzia dals 24 da zercladur 2025 vegn la Dretgira superiura dal chantun Grischun a la conclusiun, che las premissas per il relasch da mesiras preventivas n'èn betg accumuladas. Ella refusescha perquai la dumonda. La dretgira è da l'avis ch'ina violaziun da la Lescha federala cunter la concorrenza illoiala (en il suandont vegn utilisada l'abbreviaziun tudestga UWG) n'èn betg fatga valair vardaivlamain. Gia cun disposiziun dals 4 d'avrigl 2025 è la dumonda per relasch superprovisoric da las mesiras preventivas dumandadas – pia in relasch senza avoir tedlà las cunterpartidas ordavant – vegnida refusada, quai per mancanza d' ina urgenza speziala.

Tenor opiniun da la Dretgira superiura na dispona «Radio Grischa» per l'ina betg davart ina forza da designaziun en il senn da l'UWG. Bain è «Radio Grischa» enconuscent sco emettur da radio local-regiunal da pli baud ennà. Sulet sin basa da questa enconuschientscha na po dentant betg vegnì concludì, ch'ina part considerabla dal publicum metta en connex questa expressiun cun la gruppa da medias Samedia. En quest punct n'è il mussament tenor la dretgira betg reussì a las requirentas. Per l'autra n'èsi betg vardaivel per la Dretgira superiura, che las requirentas avevan utilisà l'ensaina «Radio Grischa» en lur cumparsa anoravers a partir da lur nova orientaziun

sut il num «*Radio Südostschweiz*» il 2015 enfin il 2024. En consequenza da quest nundiever sur onns na pon las requirentas betg pli far valaivel la protecziun da l'UWG.

La sentenza dals 24 da zercladur n'ha nagina vigur legala. Ella po vegnir contestada tar il Tribunal federal.

Cuira, ils 26 da zercladur 2025

Dretgira superiura dal chantun Grischun

**Contact:** Stefan Schmid, incumbensà per l'infurmaziun per las dretgiras grischunas,  
[medien.og@gr.ch](mailto:medien.og@gr.ch)

**Avis:** La communicaziun a las medias intenda l'infurmaziun da la publicitad e las medias. Las formulaziuns utilisadas pon esser differentas da talas en la sentenza. Per la giurisdicziun è sulettamain la sentenza en scrit determinanta. Tala vegn publitgada sin <https://entscheidsuche.gr.ch>